

# Penuntut IPT dijangka kembali ke kampus Mac

Kementerian kemuka cadangan dapatkan persetujuan MKN

Oleh Suzalina Halid  
suzalina@bh.com.my

**Kuala Lumpur:** Kementerian Pengajian Tinggi (KPT) menjangkakan penuntut universiti dijadual kembali ke kampus seawal-awalnya pada Mac depan.

Menterinya, Datuk Seri Dr Noraini Ahmad, berkata pihaknya akan mengemukakan permohonan mengenai perkara itu kepada Majlis Keselamatan Negara (MKN) untuk persetujuan.

“Ia masih dalam perbincangan. KPT mencadangkan Mac ini bagi permulaan semester, namun ia tidak boleh disahkan sehinggalah MKN bersetuju.

“Kami akan membentangkan

cadangan ini kepada MKN dalam masa terdekat, apabila OK, baharulah diumumkan secara rasmi,” katanya ketika dihubungi *BH*, di sini.

Penuntut institusi pengajian tinggi (IPT) awam dan swasta beralih kepada pembelajaran dan pengajaran (PdP) dalam talian selepas pelaksanaan Perintah Kawalan Pergerakan (PKP) pada Mac lalu susulan COVID-19.

Noraini berkata, sebagai persediaan menerima penuntut kembali ke kampus, pihaknya bersama universiti sedang memperkukuhkan prosedur operasi standard (SOP) sedia ada membabitkan penuntut.

Antara cadangan pengukuhan SOP itu ialah meminta pihak universiti menyediakan tempat pengasingan bagi penuntut.

“Cadangan lain, kelas secara hibrid akan dilaksanakan untuk mengurangkan sebarang risiko,” katanya.

Bagi PdP untuk Januari ini, ia akan diteruskan secara dalam talian seperti diamalkan kini.

Beliau berkata, cadangan itu



**Noraini Ahmad**

adalah hasil daripada libat urus yang diadakan dengan pihak berkepentingan sebelum ini seperti bersama naib canselor universiti awam (UA), Majlis Perwakilan Pelajar, persatuan-persatuan mahasiswa termasuk persatuan anak-anak negeri, NGO, Ketua Pengarah Imigresen, Kementerian Kesihatan, timbalan naib canselor UA dan IPTS.

Sementara itu, Timbalan Naib Canselor (Akademik dan Antarabangsa) Universiti Putra Malaysia (UPM), Prof Dr M Iqbal Saripan, pula berkata pihaknya kini melakukan persiapan jika

penuntut dibenarkan kembali ke kampus pada Mac depan.

Beliau berkata, perbincangan mengenainya sudah dilaksanakan antara universiti dengan KPT, namun keputusan akhir tertakluk kepada kelulusan MKN.

“Bagi 1 Januari depan, kita meneruskan kelas dalam talian seperti biasa hinggalah tamat semester pada pertengahan Februari dan perancangannya untuk membawa masuk penuntut ke kampus pada Mac untuk semester baharu,” katanya.

Timbalan Naib Canselor Universiti Pendidikan Sultan Idris (UPSI), Prof Datuk Dr Mohamad Shatar Sabran, pula berkata sehingga kini UPSI masih meneruskan kelas secara dalam talian termasuk membabitkan penuntut baharu diploma dijadual mendaftar, Januari ini.

Katanya, kelas secara dalam talian yang mana penuntut boleh mengikutinya dari rumah akan diteruskan sehingga berakhirnya semester bagi memudahkan perjalanan PdP.